

摘藻堂四庫全書薈要

子部

欽定四庫全書薈要

子部

御製律呂正義後編卷九十七



詳校官主事臣陳木

欽定四庫全書薈要卷一萬一千三十三

子部

御製律呂正義後編卷九十七

樂章考五

郊祀

宋一



宋郊祀樂章

宋樂自建隆訖崇興凡六改始太祖以雅樂聲高不合中和乃詔和峴以玉樸律準較洛陽銅望臬石尺為新度以定律呂故建隆以來有和峴樂仁宗留意音律判太常燕肅言器久不諧復以樸準考正時李照以知音聞謂樸準高五律與古制殊請依神瞽法鑄編鐘既成遂請改定雅樂乃下三律鍊白石為磬範中金為鐘圖三辰五靈為器之飾故景祐中有李

照樂未幾諫官御史交論其非竟復舊制其後詔侍
從禮官參定聲律阮逸胡瑗實與其事更造鐘磬止
下一律樂名大安乃試考擊鐘聲弁鬱震掉不和滋
甚遂獨用之常祀朝會焉故皇祐中有阮逸樂神宗
御極未遑制作間從言者釐正一二知禮院楊傑條
上舊樂之失名范鎮劉几與傑參議几傑請遵祖訓
一切下王樸樂二律用仁宗時所制編鐘追考成周
分樂之序辨正二舞容節而鎮欲求一稔二米真黍

以律生尺改修鐘量廢四清聲詔悉從凡傑議樂成
奏之郊廟故元豐中有楊傑劉几樂范鎮謂其聲雜
鄭衛請太府銅制律造樂哲宗嗣位以樂按試於庭
比李照樂下一律故元祐中有范鎮樂楊傑復議其
非謂出於鎮一家之學卒置不用徽宗銳意制作以
文太平於是蔡京主魏漢津之說破先儒累黍之失
用夏禹以身為度之文以帝指為律度鑄帝鼎景鐘
樂成賜名大晟謂之雅樂頌之天下故崇寧以來有魏

漢津樂夫宋樂屢變而卒無一定諸家累黍之說或縱或橫既各執一見而以身為度尤屬荒唐南渡後大抵皆用先朝之舊未嘗有所改作其後諸儒朱熹蔡元定輩出講明制作之本以究其極著為成書然亦徒托空言未及試之考擊也今特就其所用樂章具列於左

建隆郊祀樂章

案宋史樂志曰太祖受命詔太常竇儼定樂改周

樂十二順為十二安蓋取治世之音安以樂之義
其南郊祀昊天上帝降神用高安皇帝升降用隆
安奠玉帛用嘉安奉俎用豐安酌獻用禧安飲福
用禮安亞獻終獻用正安送神用高安凡八章其
辭並翰林學士竇儼撰

降神用高安

在國南方時惟就陽以祈帝祉式致民康豆邊鼎俎金
石絲簧禮行樂奏皇祚無疆

皇帝升降用隆安

步武舒遲陞壇肅祇其容允若于禮攸宜

奠玉幣用嘉安

嘉玉制幣以通神明神不享物享于克誠

奉俎用豐安

笙鏞備樂繭栗陳牲乃迎芳俎以薦高明

酌獻用禧安

丹雲之爵金龍之杓挹于尊壘是曰清酌

飲福用禮安

潔茲五齊酌彼六尊致誠斯至率禮彌敦以介景福永
隆後昆重熙累洽帝道攸尊

亞終獻用正安

謂天蓋高其聽孔卑聞樂歆德介以福禧

送神用高安

倏兮而來忽兮而迴雲馭杳邈天門洞開

咸平郊祀樂章

案宋史樂志曰真宗親郊舍人院撰樂章降神用
高安皇帝升降用隆安奠玉幣用嘉安奉俎用豐
安酌獻用禧安飲福用禮安亞獻終獻用正安送
神用高安凡八章

降神用高安 文德之舞六變

圜丘何方在國之陽禮神合祭運啟無疆祖考來格籩
豆成行其儀肅肅降福穰穰

皇帝升降用隆安 九行禮皆用

禮備樂成乾健天行帝容有穆佩玉鏘鳴
奠玉幣用嘉安

定位毖祀告于神明嘉玉量幣享于克誠
奉俎用豐安

有牲斯純有俎斯陳進于上帝昭報深仁
酌獻用禧安

大報于帝盛德升聞醴齊良潔粢盛苾芬
飲福用禮安

祀帝園丘九州獻力禮行於郊百神受職靈祇格思享
我明德天鑒孔章玄祉昭錫

亞終獻用正安

羽籥云罷干戚載揚接神有恪錫美無疆

送神用高安

神駕來思風舉雲飛神馭歸止天空露晞

景祐郊祀樂章

紫宋史樂志曰景祐朝親郊三聖並侑二首奠幣

用廣安酌獻用彰安常祀二首太祖配位奠幣用
定安酌獻用英安凡四章餘皆用舊辭

奠幣用廣安

千齡啟運二后在天嘉壇並侑億萬斯年

酌獻用彰安

皇基締構帝系靈長躬薦鬱鬯子孫保昌

太祖配位奠幣用定安

翕受駿命震疊羣方侑祀上帝德厚流光

酌獻用英安

誕受靈符肇基丕業配享潔尊永隆萬葉

元符郊祀樂章

案宋史樂志曰哲宗親郊撰樂章降神用景安升
降用乾安退文舞迎武舞用正安徹豆用熙安送
神用景安凡五章餘皆用舊辭

降神用景安六變辭同

無為靡遠深厚廣圻祭神恭在弁冕袞衣粢盛豐美明

德馨輝以祥以佑非敢專祈

升降用乾安

罍洗飲福並奏

神靈擁衛景從雲隨玉色溫粹天步舒遲周旋陟降皇
心肅祇千靈是保百福攸宜

退文舞迎武舞用正安

左手執籥右手秉翟進旅退旅萬舞有奕

徹豆用熙安

陟彼郊丘大祀是承其豆孔庶其香始升上帝時歆以

我齋明卒事而徹福祿來成

送神用景安

馨遺八尊器空二簋至祝至虔穹祇貺祉

政和郊祀樂章

案宋史樂志曰徽宗政和時親郊皇帝升降用乾
安配位酌獻用大寧凡三章餘皆用舊辭

升降用乾安

因山為高爰陟其首玉趾躩如在帝左右帝謂我王予

懷仁厚眷言顧之永綏九有

配位酌獻用大寧

二章

於穆文祖妙道九德默契靈心肇基王迹啟佑後人垂
裕罔極合食昭薦孝思維則

於皇順祖積德累祥發源深厚不耀其光基天明命厥
後克昌是孝是享申錫無疆

建炎郊祀樂章

案宋史樂志曰高宗南渡國步尚艱乃詔有司天

帝地祇及他大祀先以時舉太常尋奏近已增募

樂工千羽冀簋亦備始循舊禮用登歌樂舞其祀

昊天上帝降神用景安皇帝盥洗用正安升壇用

正安上帝位奠玉幣用嘉安太祖位奠幣用定安

皇帝還位用正安捧俎用豐安上帝酌獻用嘉安

太祖位酌獻用英安文舞退武舞進用正安亞終

獻用文安徹豆用肅安送神用景安望燎用正安

凡十七章

降神用景安

圜鐘為宮三奏

蒐講上儀式修誌祀日吉辰良禮成樂備風馭雲旗聿
來歆止嘉我馨德介茲繁祉

黃鍾為角一奏

我將我享涓選休成執事有恪惟寅惟清樂既六變肅
雍和鳴高高在上庶幾是聽

太簇為徵一奏

禮崇禋祀備物薦誠昭格穹昊明德惟馨風馬雲車盼
嚮居歆申錫無疆賚我思成

姑洗為羽一奏

惟天為大物始攸資恭承禋祀以報以祈神不可度日
監在茲有馨明德庶其格思

盥洗用正安

靈承上帝厲意專精設洗于阼壘水以清盥以致潔感
通神明無遠弗届其饗茲誠

升壇用正安

皇矣上帝神格無方一陽肇復典祀有常豆登曲豆潔薦
德馨香棐忱居歆降福穰穰

上帝位奠玉幣用嘉安

治極發聞不瑕有芬嘉玉陳幣神屆欣欣誠心昭著欽
恭無聞以妥以侑篤祐何垠

太祖位奠幣用定安

茫茫蒼穹孰知其紀精意潛通雖遠而邇量幣薦誠有

寶斯篚睠然顧之永錫繁祉

皇帝還位用正安

典祀有常昭事上帝奉以告虔逮迄奠幣鐘鼓既設禮儀既備神之格思恭承貺賜

捧俎用豐安

祀事孔明禮文惟楙爰潔犧牲載登俎豆或肆或將無聲無臭精稷潛通永綏我后

上帝酌獻用嘉安

氣萌黃鍾萬物資始欽若高穹吉蠲時祀神筴泰元增
授無已羣生熙熙函蒙繁祉

太祖位酌獻用英安

赫赫翼祖受命于天德邁三代威加八埏陟配上帝明
裡告虔流光垂裕於萬斯年

文舞退武舞進用正安

大德日生陰陽寒暑樂舞形容千戚籥羽一弛一張退
旅進旅神安樂之祉錫綿宇

亞獻終獻用文安

惟聖普臨順皇之德典禮有彝享祀不忒遵豆靜嘉降
登彤飾神具醉止景貺咸集

徹豆用肅安

內心齊誠外物蠲潔神來迪嘗俎豆既徹燕及羣生靡
或天闕降福穰穰時萬時億

送神用景安

於赫上帝乘龍御天惟聖克事明饗斯虔薦豆云徹靈

焱且旋載錫休祉其惟有年

望燎用正安

靈承上帝精意感通馨香旁達深盛既豐登降有儀祀
備樂終神之聽之福祿來崇

紹興郊祀樂章

案宋史樂志曰高宗紹興十三年初舉郊祀命學
士院製宮廟朝獻及園壇行禮登門肆赦樂章凡
五十有八至二十八年以臣僚有請改定於是御

製樂章十有三及徽宗元年御製仁宗廟樂章一
共十有四篇餘則分命大臣與兩制儒館之士一
新撰述並懿節別廟樂曲凡七十有四俱彙見焉
其祀圜丘皇帝入中壝用乾安降神用景安盥洗
用乾安升壇用乾安昊天上帝位奠玉幣用御製
嘉安皇地祇位奠玉幣用御製嘉安太祖皇帝位
奠幣用御製廣安太宗皇帝位奠玉幣用御製化
安降壇用乾安還位用乾安奉俎用豐安再詣盥

洗用乾安再升壇與初升同惟易奠玉作奠酌昊天上帝位酌獻用御製禧安皇地祇位酌獻用御製光安太祖皇帝位酌獻用御製彰安太宗皇帝位酌獻用御製韶安還位用乾安入小次用乾安文舞退武舞進用正安亞獻用正安終獻同止易再酌為三酌出小次位用乾安詣飲福位用乾安降壇同飲福用禧安還位用乾安徹豆用熙安送神用景安望燎用乾安望瘞用乾安還大次用乾

安還內用采茨凡三十章

皇帝入中壝用乾安

帝出於震巽惟齊明律曰姑洗以示潔清我交於神蠲
意必精既盥而往祈鑒斯誠

降神用景安

陽動黃宮日旋南極天門蕩蕩百神受職爰熙紫壇煥
黃珠色神哉沛來蓋親有德

盥洗用乾安

帝顧明德監於克誠齊戒滌濯式示潔清郊丘合祛享
意必精既盥而薦熙事備成

升壇用乾安

帝臨崇壇媪神其從稽古合祛並侑神宗升階奠玉誠
意感通貺施鼎來受福無窮

昊天上帝位奠玉帛用嘉安

御製

上穹昊天日星垂曜照臨下土王國是保維玉與帛寅
恭昭報永左右之欽若至道

皇地祇位奠玉帛用嘉安

御製

至哉坤厚隤然止靜柔載動植資始成性玉光幣色璨
若其映式恭禋祀有邦之慶

太祖皇帝位奠幣用廣安

御製

明明翼祖並侑泰壇肇造綿宇王業孔艱表正封畧上
際下蟠躬以太報亦止於燔

太宗皇帝位奠玉帛用化安

御製

赫赫巍巍及時純熙昊天成命后則受之登邁邃古光

被聲詩有幣陟配繇謀所貽

降壇用乾安

躬展盛儀天步逡巡樂備禮交嘉玉既陳神方安坐薦
祉紛綸陟降有容皇心載勤

還位用乾安

克昭王業成命昊天泰時禋燎八陛惟圓肅然威儀登
降周旋是謂精享神監吉蠲

奉俎用豐安

至大惟天云何稱德展誠致薦牲用博碩誠以牲寓帝
由誠格居歆降祥時萬時億

再詣盥洗用乾安

帝出於震巽惟潔齊神明其德迺稱禋柴惟茲吉蠲昭
事聿懷重盥而祀敷錫孔皆

昊天上帝位酌獻用禧安

御製

謁款壇陞祇祀泰禋丘園自然可格至神桂尊登酌嘉
薦方新靡福菲眇敷佑下民

皇地祇位酌獻用光安

御製

厚德光大承元之明茲潛享吹升於昭清冰天桂海咸
資化成恭酌彛醪報本惟精

太祖皇帝位酌獻用彰安

御製

於赫皇祖創業立極肅肅靈命蕩蕩休德嘉觴精潔雅
奏金石丕顯神謨惟後之則

太宗皇帝位酌獻用韶安

御製

丕鑠帝宗復受天命羣陰猶黷一戎大定奠鬯斯馨功

歌在詠佑啓後人文軌蚤正

還位用乾安

肆類上帝懷柔百神稟結既設珪幣既陳精誠潛交已
事而竣佑我億載基圖日新

入小次用乾安

恭展美報聿修上儀禮樂和節登降適宜德焉斯親神
靡不娛海內承福式固邦基

文舞退武舞進用正安

泰元尊臨富媪繁祉於皇祖宗既昭格止奏舞象功靈
其有喜永言孝思盡善盡美

亞獻用正安

終獻同止易再爵為三爵

陽丘其高神祇並位既奠厥玉既奉厥醴亦有嘉德克
相陟祀旨酒載爵以成熙事

出小次用乾安

爰熙紫壇天地並貺來燕來寧畢陳鬱鬯承神至尊精
意所鄉告靈饗矣祉福其暢

詣飲福位用乾安

降壇同止易將作以

帝臨崇壇媪神其從祖宗並歆福祿攸同兵寢刑措時和歲豐其應受之將施無窮

飲福用禧安

八音克諧降神出祗風馬雲車陟降在茲錫我純嘏我應受之一人有慶燕及羣黎

還位用乾安

帝出於震孝奏上儀燔燎羶鄉神來燕娛肅若舊典罔

或不祇既右饗之翕受蕃釐

徹豆用熙安

燎鄉既升炳膋以潔於豆於登焘蒿有飶紫幄煩黃神
其安悅將以慶成薄言盍徹

送神用景安

九霄眇邈神不可求何以降之監德之修三獻備成神
不可畱何以送之保天之休

望燎用乾安

謂天蓋高陽噓而生日月列宿皆天之神肆求厥類與
陽俱升視燎於壇以終其勤

望瘞用乾安

謂地蓋厚陰翕而成社稷羣望皆地之靈肆求厥類與
陰俱凝視瘞於坎以終其勤

還大次用乾安

舞具八佾樂備六成大矣孝熙厲意專精已事而竣迴
軫還衡我應受之以莫不增

還內用采茨

五輅鳴鑾八神警蹕天官景從莫不祇栗稷威盛容昭
哉祖述祚我無疆叶氣充溢

嘉泰郊祀樂章

案宋史樂志曰寧宗嘉泰時郊祀樂章皇帝入中
壇用乾安降神用景安皇帝盥洗用乾安升壇降
壇還位尚書奉俎再詣盥洗再升壇降壇還位入
小次並用乾安俱各有辭文舞退武舞進用正安

亞獻終獻亦各用正安出小次詣飲福位各用乾
安飲福用禧安降壇還位各用乾安尚書徹豆用
熙安送神用景安詣望燎位詣望瘞位各用乾安
還大次還內亦各用乾安凡二十九章

皇帝入中壝用乾安

合祀丘澤登侑祖宗顧諟惟精靈承惟恭有嚴皇儀有
莊帝容監於克誠肅肅雍雍

降神用景安

圜鐘為宮

天門蕩蕩雲車陰陰百神感秩三靈顧歆神哉來娛神
哉溥臨饗時宋德翼翼小心

黃鍾為角

華蓋既動紫微洞開星樞周旋日車徘徊靈兮顧佑靈
兮沛來載燕載娛式時壇垓

太簇為徵

泰尊媪釐祖功宗德辰躔陪營嶽瀆受職神哉來下神

哉來格饗德惟馨留虞嘉席

姑洗為羽

金石宣昭羽旄紛綸潔火夕照明水夜陳娛哉惟靈娛
哉惟神風馬招搖惟德之親

盥洗用乾安

皇帝儉勤盥用陶瓦禮神頒祇奠幣薦葦月鑑陰肅醴
液融冶挹彼注茲禮無違者

升壇用乾安

崇臺穹窿高靈下墮慶陰彷彿從坐嶸峨宵昇於丘時
通燿火維天之命百祿是荷

降壇用乾安

帝饗於郊一精二純紫觚陟降嘉玉安陳神方畱娛瑞
貺紛綸申錫無疆螽斯振振

還位用乾安

肅肅禮度銷銷宮奏天行徐謚皇儀昭懋光連圭璧物
備簋豆於皇以饗無聲無臭

尚書奉俎用乾安

列俎孔陳嘉籩維實鼎燧陽燧玉流星液我牲既碩我
薦既苾神監下昭安坐翔吉

再詣盥洗用乾安

帝登初觴禮嚴再盥精明顯昭齊顓洞貫靈娛留兪神
光炳煥我宋受福永壽於萬

再升壇用乾安

紫壇嶽立神光夜燭有儼旒采有鸞佩玉霄垠顧佑祖

宗熙穆對越不忘俾爾戩穀

降壇用乾安

天容澄謐景氣晏和瓚斝薦醇銷璆叶歌帝降庭止夜
其如何神助之休宜爾衆多

還位用乾安

甘露流英卿雲舒采靈俞有喜神光晻曖穆穆來蒞洋
洋如在帝用居歆澤及四海

入小次用乾安

聽惟饗德監惟棐忱顧謏思明靈承思欽永言端蒞肅
對下臨上帝是皇毋貳爾心

文舞退武舞進用正安

羽籥陳容干戚按節德閑而泰功勞而決虞我神祇揚
我謨烈盡美盡善福流有截

亞獻用正安

帝臨中壇神從八陛華玉展瑞明馨薦醴亦有嘉德克
相盛禮獻茲重觴降福瀰瀰

終獻用正安

敬事天地升侑祖宗陳籩於三介觴之重秉德翼翼有
來雍雍相予祀事福嘏日溶

出小次用乾安

孝奏展成熙儀畢薦光流桂俎祥衍椒奠風管晨凝雲
容天轉拜貺於郊右序詒燕

詣飲福位用乾安

所饗惟清所欽惟馨靈喜留俞天景窈冥福祿來成福

祿來寧皇用時效壽我慈庭

飲福用禧安

瓚葷觶醕醢醢有醴惟香有酒惟欣
彤饗豐融懿懿芬芬我龍受之如川如雲

降壇用乾安

天錫多祉皇受五福言瞻瑤壇
迄承瑄玉昭星炳耀元氣回復帝儀
載旋有嘉穆穆

還位用乾安

璇圖天深鼎文日輝慶流皇家象炳紫微乾回冕旒雲
煥袞衣何千萬年式于九圍

尚書徹豆用熙安

蘭豆既升簋簋既登禮備俎實饗貴牲蒸時乃告徹器
用畢興祚我皇基介福是膺

送神用景安

神輔有德來燕來娛禮薦熙成三靈逆整塵神饗有道言
旋言歸福祉咸蒙百世本支

詣望燎位用乾安

此章與紹興望燎樂章畧同

莫神乎天陽嘘而生日月星辰皆乾之精肆求厥類與
陽俱升眡燎於壇展也大成

詣望瘞位用乾安

此章與紹興望瘞樂章畧同

地載萬物陰翕而成山嶽河瀆皆坤之靈克肖其象與
陰俱凝眡瘞於坎思求厥成

還大次用乾安

福方流胙祈方欽柴鹵簿載肅球架允諧帝祉具臨皇
靈允懷邁御於次降福孔皆

還內用乾安

八神呵蹕千官景從回軫還衡稷威盛容妥飾芝鳳御
朝雲龍歸壽慈闈敷時民雍

宋祈穀樂章

案宋史樂志曰仁宗景祐時上辛祈穀御製樂章太

宗配位奠幣用仁安酌獻用紹安凡二章

太宗配位奠幣用仁安

天祚有開文德來遠祈穀日辛侑神禮展

酌獻用紹安

於穆神宗惟皇永命薦醴六尊聲歌千詠

紹興祈穀樂章

案宋史樂志曰高宗紹興朝祈穀降神盥洗升壇
還位及上帝奠玉幣奉俎並同圜丘太宗位奠幣

用宗安上帝位酌獻用嘉安太宗位酌獻用德安
不同園丘者凡三章

太宗位奠幣用宗安

於穆思文克配上帝涓選休成遵揚嚴衛祇薦明誠肅
陳量幣享茲吉蠲申錫來裔

上帝位酌獻用嘉安

三陽肇新萬物資始精誠祈天其聽斯邇願均雨暘田
疇之喜如坻如京以備百禮

太宗位酌獻用德安

天錫勇智允惟太宗功隆德盛與帝比崇禮嚴陟配誠
達精衷尚其錫祉歲以屢豐

宋雩祭樂章

案宋史樂志曰仁宗時孟夏雩祀昊天上帝太祖配
坐奠幣用獻安酌獻用感安凡二章其辭並仁宗御
製

太祖配位奠幣用獻安

昊天蓋高祀事為大嚴配皇靈億福來介

酌獻用感安

龍見而雩神之來格犧象精良威靈赫奕

紹興雩祀樂章

案宋史樂志曰高宗紹興時雩祀上帝位酌獻用
嘉安一章

上帝位酌獻用嘉安

蒼蒼昊穹覆臨下土欽惟歲事民所依怙爰竭精虔禮

典斯舉甘澤以時介我稷黍

宋四祀樂章

案宋史樂志曰冬至孟春孟夏季秋四祀上公攝事
降神用景安二章太尉行用正安司徒奉俎用豐安
飲福用廣安亞終獻用文安送神用景安凡七章

降神用景安二章

天何言哉至清而健默定幽贊降神福善夙設園壇恭
陳嘉薦貞馭下臨儲休錫羨

生物之祖興益之宗于國之陽以禋昊穹六變降神於
論鼓鐘親德享道錫羨無窮

太尉行用正安

禮經之重祭典為崇上公攝事登降彌恭庶品豐潔令
儀肅雍百神萃止惟吉之從

司徒奉俎用豐安

禮崇禋祀神鑒孔明牲牲博膾以魚以烹馨香蠲潔品
物惟精錫以純嘏享茲至誠

飲福用廣安

簠簋既陳吉蠲登薦洗心防邪肅祇祭典陟降惟寅
籩豆有踐百福咸宜淳耀丕顯

亞終獻用文安

秩秩禮文肅肅嚴祀仰洽神休式協民紀灌獻有容
叙其俎簋明德惟馨以介丕祉

送神用景安

帝臨中壇肅恭禋祀靈景舒光飛龍旋軌送神有章
神

心具醉輔德惟仁永錫元祉

宋祀五方帝樂章

案宋史樂志曰真宗景德以後祀五方帝其祀青帝
降神用高安奠玉幣酌獻並用嘉安送神用高安酌
獻用祐安祀赤帝降神用高安奠玉幣酌獻並用嘉
安送神用高安祀黃帝降神用高安奠玉幣酌獻用
嘉安送神用高安祀白帝降神用高安奠玉幣酌獻
用嘉安送神用高安祀黑帝降神用高安奠玉幣酌

獻用嘉安送神用高安凡一十六章

降神用高安 六變 以下祀青帝

四序伊始三陽肇新氣迎東郊蟄戶咸春功宣播殖澤
被生民祝史正辭昭事惟寅

奠玉幣酌獻用嘉安

條風始至盛德在木平秩東作種獻種穆律應青陽氣
和玉燭惠彼兆民以介景福

送神用高安

備物致用薦羞神明禮成樂舉克享克禋

酌獻用祐安

條風斯應候歷維新陽和啟蟄品物皆春
篚簧協奏簋
簋畢陳精羞豐薦景福攸臻

降神用高安 以下祀赤帝

長嬴戒序候正南訛功資蕃育氣應清和
鼎寶嘉俎樂
備登歌神其來享降福孔多

奠玉幣酌獻用嘉安 景祐用祐安辭亦不同

象分離位德配炎精景風協律化神含生百嘉茂育乃
順高明神無常享享於克誠

送神用高安

籩豆有踐黍稷惟馨禮終三獻神歸杳冥

降神用高安

以下祀黃帝

坤輿厚載黃裳元吉宅中居正含章抱質分王四季其
功靡秩育此羣生首茲六律

奠玉幣酌獻用嘉安

景祐用祐安辭亦不同

中央定位厚德維新五行攸正四氣爰均笙鏞以間簋
簋斯陳為民祈福肅奉明禋

送神用高安

土德居中方輿配位樂以送神式申昭事

降神用高安

以下祀白帝

西顛騰晶天地始肅盛德在金百嘉茂育曠弩射牲築
場登穀明靈格思旌罕紛屬

奠玉幣酌獻用嘉安

景祐用祐安辭亦不同

博碩肥膾以魚以烹嘉粟旨酒有彌斯盈肴核惟旅肅
肅烝烝吉蠲備物享於克誠

送神用高安

飈輪戾止景燭靈壇金奏繹如白露漙漙

降神用高安

以下祀黑帝

隆冬戒序歲歷順成一人有慶萬物由庚有旨斯酒有
碩斯牲報功崇德正直聰明

奠玉幣酌獻用嘉安

景祐用祐安辭亦不同

大儀幹運星紀環周三時不害黍稷盈疇克誠致享品物咸羞禮成樂變錫祚貽休

送神用高安

管磬咸和禮獻斯畢靈馭言旋神降之吉

紹興以後祀五方帝樂章

案宋史樂志曰高宗紹興以後祀五方帝其祀青帝降神用高安升殿用正安奠玉幣用嘉安大昊氏位奠幣亦用嘉安奉俎豐安酌獻青帝用祐安

酌獻太昊亦用祐安亞終獻用文安送神用高安
祀赤帝及神農氏祀黃帝及有熊氏祀白帝及少
昊氏祀黑帝及高陽氏降神升殿奠玉幣奉俎酌
獻亞終獻送神樂曲名並與祀青帝及太昊同其
樂辭各異凡六十章

降神用高安

以下祀青帝

圜鍾為宮三奏

於神何司而德于木肅然顧歆則我斯福我祀孔時我

心載祇匪我之私神來不來

黃鍾為角一奏

神兮焉居神在震方仁以為宅秉天之陽神之來矣道
修以阻望神未來使我心苦

太簇為徵一奏

神在途矣習習以風百靈後先敢一不恭奔走癘疫被
除菑凶顧瞻下方逍遙從容

姑洗為羽一奏

溫然仁矣熙然春矣龍駕帝服穆將臨矣我酒清矣我
肴烝矣我樂備矣我神顧矣

升殿用正安

在國之東有壇崇成節以和樂式降式登潔我佩服璆
琳鏘鳴匪壇斯高曷安歆靈

青帝奠玉幣用嘉安

物之熙熙胡為其然蒙神之休迺敢報旃有邸斯珪有
重斯幣於以奠之格此精意

太昊氏位奠幣用嘉安

卜歲之初我迎春祇孰克侑饗曰古宓戲於皇宓戲萬
世之德再拜稽首敢愛斯璧

奉俎用豐安

靈兮安留煙燎既升有碩其牲有俎斯承匪牲則碩我
德惟馨緩節安歌庶幾是聽

青帝酌獻用祐安

百末布蘭我酒伊旨酌以匏爵洽我百禮帝居青陽顧

予嘉觴右我天子宜君宜王

太昊酌獻用祐安

五德之王誰實始之功括造化與天無期酌我清醑盥
獻載飭神鑒孔饗天子之德

亞終獻用文安

貳觴具舉承神嘉虞神具醉止眷焉此都我歲方新我
畝伊殖時暘時雨繫神之力

送神用高安

忽而來兮格神鴻休忽而往兮神不予留神在天兮福
我壽我千萬春兮高靈下墮

降神用高安 以下祀赤帝

圜鍾為宮

離明御正德協于火有感其生維帝是何帝圖炎炎貽
福錫我鑒于安虔高靈下墮

黃鍾為角

赤精之君位于朱明茂育萬物假然長羸我潔我盛我

蠲我誠神其下來雲車是承

太簇為徵

八卦相蕩一氣散施隆熾恢台職神尸之肅肅颺御神
戾于天於昭神休天子萬年

姑洗為羽

暉暉其光炳炳其靈宵其如容歛其如聲扇以景風導
以朱存我德匪類神其安留

升殿用正安

除地國南有基崇崇載陟載降式虔式恭燎烟既燔散
冕斯容神如在馬肆予幽通

赤帝奠玉幣用嘉安

太微呈祥炎德克彰佑我基命格于明昌一純二精有
嚴典祀予以奠之以介繁祉

神農氏奠幣用嘉安

練以纁黃有篚將之彤蠻斯答有神昭之維神于民實
始貨食歸德報功敢忘王國

奉俎用豐安

有牲在滌從以騂牡或肆或將有潔其俎神嗜飲食
餼芬芬莫腆于誠神其顧歆

赤帝酌獻用祐安

四月維夏兆于重離帝執其衡物無癘疢於皇帝功思
樂旨酒奠爵既成垂福則有

神農氏酌獻用祐安

猗與先農肇茲黍稷既殖既播有此粒食秬鬯潔清粢

尊疏畧竭我瑤竿莫報嘉績

亞終獻用文安

盥爵奠竿載虔載恭邊豆靜嘉於樂鼓鐘禮備三獻神
具醉止孰顯神德揚光紛委

送神用高安

神來何從馭然靈風神去何之杳然幽蹤伊神去來霧
散雲蒸獨遺休祥山崇川增

降神用高安

以下祀黃帝

圜鍾為宮

維帝奠位乃咸于時孰主張是而樞紐之穀我復我比
予于兒告我冠服迨其委蛇

黃鍾為角

蓀無不在日與我居孰不可來彤鬻斯須象服龍駕淵
淵鼓桴蓀不汝多多汝意孚

太簇為徵

樂哉帝居逝留無常爾信我宅爾中我鄉乃眷茲土於

赫君王翩然下來去未遽央

姑洗為羽

澹兮撫琴啾兮吹笙神之未來肅穆以聽續紛羽旄姣
服在中神既來止亦無惰容

升殿用正安

民生地中動作食息與我周旋莫匪爾極捕鯨東海蹇
茅南山彼勞如何矧升降間

黃帝奠玉幣用嘉安

萬禱之寶一約之絲孕之育之誰為此施歸之后神神
曰何為不宰之功蕩然四垂

有熊氏奠幣用嘉安

維有熊氏以土勝王其後皆公茲德用壯黼黻幅烏裳
衣是創幣之元纁對此昭亮

奉俎用豐安

王曰欽哉無愛斯牲登我元祀亦有皇靈以將以享或
剝或烹大夫之俎天子之誠

黃帝酌獻用祐安

黍以為翁鬱以為婦以侑元功以酌大斗伊誰歆之皇
皇帝后伊誰嘏之天子萬壽

有熊氏酌獻用祐安

昔在縣邈有人公孫登政撫辰節用良勤所蓄既大所
行宜遠載其華蘩從以簫管

亞終獻用文安

羽觴更陳厥味清涼飲之不煩又有蔗漿夜未艾止明

星浮浮願言安靈靈兮淹留

送神用高安

靈不肯留沛兮將歸玉節焱逝翠旗並馳顧瞻佇立悵
然佳期蹇千萬年無覈人斯

降神用高安

以下祀白帝

圜鍾為宮

白藏啓序庶彙向成有嚴禋祀用答幽靈風馬雲車來
燕來寧洋洋在上休福是承

黃鍾為角

素精肇節金行固藏氣冲炎伏明河翻霜功收有年禮
薦有章祇越眇冥鴻基永昌

太簇為徵

昊天之氣擎斂萬彙涓日潔齊有嚴厥祀有牲維肥有
酒維旨神之燕娛錫茲福祉

姑洗為羽

執矩斯兌實惟素靈受職儲休萬寶以成饗于西郊奠

玉陳牲侑以雅樂來歆克誠

升殿用正安

素森諧律西顥墮靈肇復元祀晨煬肅清下土層陔嘉
薦芳馨以御蕃祉介我西成

白帝奠玉幣用嘉安

惟時素秋肇舉元祀禮備樂作降登有數洋洋在上神
既來止神之格思錫我繁祉

少昊氏位奠幣用嘉安

西顥肅清羣生茂遂有嚴報典孔明祀事珪幣告虔神
靈燕喜賚我豐年以錫民祉

奉俎用豐安

洽禮既陳諧音具舉有滌斯牲孔碩為俎維帝居歆介
我稷黍樂哉有秋繫神之祐

白帝酌獻用祐安

徂商肇祀靈蓋孔饗恭承嘉禧湛澹相宅監此馨香靈
其安畱疇惠下民匪靈之休

少昊氏位酌獻用祐安

沆碣西顛功蓋萬世乘金宅兌侑我明祀嘉觴布蘭牲
玉潔精神之燕虞肅用有成

亞終獻用文安

肅成萬物沆寥其秋惟茲祀事戾止靈存酌獻具舉典
禮是求冀福斯成黍稷盈疇

送神用高安

沆碣白藏順成萬寶有來德馨於昭神妥露華晨晞颺

馭聿還介我嗣歲澤均幅員

降神用高安 以下祀黑帝

圜鍾為宮

吉日壬癸律中應鍾國有故常北郊迎冬乃歲修一作祀
事必祇必恭明默雖異感而遂通

黃鍾為角

良月盈數四氣推遷帝于是時典司其權高靈下墮降
祉幅員神之聽之祀事罔愆

太簇為徵

北方之神執權司冬三時務農于馬告功禮備樂作歸
功于神風馬來游永佑斯民

姑洗為羽

天地閉塞盛德在水黑精之君降福美祉洋洋在上若
或見之齊莊承祀其敢數思

升殿用正安

味爽昭事煌煌露光滌漑蠲潔容儀肅莊牲肥酒旨薦

此芬芳降陟有序禮無越常

黑帝奠玉幣用嘉安

晨曦未升天宇肅穆祇若元祀將以幣玉神之格思三
獻茅縮明靈懌豫下土是福

高陽氏位奠幣用嘉安

颺馭雲蓋神之顧歆丕昭禮容發揚樂音祀事既舉仰
當神心申以嘉幣式薦誠謹

奉俎用豐安

辰牡孔碩奉牲以告秘祝非祈豐年宜報至意昭徹交
乎神明降福穰穰用燕羣生

黑帝酌獻用祐安

赫赫神游周流八極德馨上聞于焉來格不腆酒醴用
伸悃愫神其歆之民用嚮德

高陽氏酌獻用祐安

十月納禾民務藏蓋不有神休民罔攸賴孟冬之吉禮
行不昧神降百祥昭著著蔡

亞終獻用文安

萬彙摯斂時惟冬序蠢爾黎氓入此室處酌獻告神禮
以時舉賴此陰隲民有所怙

送神用高安

神之戾止天門夜開禮備告成雲輶急回旗纛掩靄萬
靈喧阗獨遺祉福用澤九垓

宋祀感生帝樂章

案宋史樂志曰太祖乾德以後祀感生帝降神用大

安太保行用保安壘洗用正安奠玉幣用慶安奉俎
用咸安酌獻用崇安飲福用廣安亞終獻用文安徹
豆用肅安送神用普安凡十章

降神用大安

和均玉管政協璿衡四序資始萬物含生皇猷允洽至
德惟明為民祈福克致精誠

太保行用保安

衣冠儼若步武有容公卿濟濟率禮惟恭

疊洗用正安

昊天降康云何以報斯謀斯惟雍雍灌鬯身之潔兮神
斯來止神之享兮民斯福矣

奠玉幣用慶安

籩豆有踐玉帛斯陳神無常享享于精純

奉俎用咸安

俎實具列明德惟馨肅容祇薦神其降靈

酌獻用崇安

樂調鳳律酒汜犧尊至靈斯御盛德彌敦

飲福用廣安

三陽戒律萬彙騰精既蘓昆虫畢達勾萌具陳犧象式
薦誠明錫以蕃祉來保咸平

亞終獻用文安

大君有命祀典咸修薦獻式叙淑慎優柔

徹豆用肅安

以下二首政和中製

奉承明祀惟羊惟牛印盛于豆備陳庶羞鐘鼓喤喤神

具醉止其徹嘉邇永綏福祉

送神用普安

既臨下土復歸於天神之報貺受福無邊

景祐祀感生帝樂章

案宋史樂志曰仁宗景祐以後祀感生帝宣祖配位奠幣用皇安酌獻用肅安凡二章

宣祖配位奠幣用皇安

濬發長源粵惟始祖五運協圖萬靈來護

酌獻用肅安

龍德而隱源流則長宜乎億祀侑享爾昌

元符祀感生帝樂章

案宋史樂志曰哲宗元符以後祀感生帝降神用大安初獻升降用保安帝位酌獻用保安亞終獻用文安送神用普安帝位奠玉幣同乾德慶安禧祖奠幣同景祐皇安酌獻同景祐宣祖肅安奉俎同熙寧咸安不同者凡五章

降神用大安 六變

二儀交泰七政順行四序資始萬物含生皇朝創業盛
德致平為民祈福潔此精誠

初獻升降用保安

冕旒儼若步武有容公卿濟濟韶護邕邕

帝位酌獻用保安

此章首二句同乾德崇安

樂和鳳律酒奠犧尊神明斯享禮盛難論

亞終獻用文安

此章首二句同乾德文安

大君有命闕典咸修帝歆明祀佑聖千秋

送神用普安

俯臨下土迴復上天觸類而長荷福無邊

紹興祀感生帝樂章

案宋史樂志曰高宗紹興以後祀感生帝降神用
大安盥洗用保安升殿用保安感生帝位奠玉幣

用光安僖祖位奠幣用皇安奉俎用咸安感生帝
位酌獻用崇安僖祖位酌獻用肅安文舞退武舞
進用正安亞終獻用文安徹豆用肅安送神用大
安望燎用普安凡一十六章

降神用大安

圜鍾為宮

炎精之神飛輶碧落駕以浮雲丹書赤雀禮備豆籩樂
諸肅勺神具醉止佑我景鑠

黃鍾為角

宋德惟火神實司之上儀申歲神方重離瑤幣告潔秀
華金支啾啾神龍來介繁禧

太簇為徵

于物司火于方時南璇霄來下羽衛毳毳祠官祝釐聯
珮合簪本支有行則百斯男

姑洗為羽

惟神之安方解羽鑿赤旂霞曳從以炎官居歆嘉薦膺

饗靈壇神之格矣民訖多盤

盥洗用保安

衝牙鏘鳴肅容專精交神之義罔敢弗誠設洗于昨壘
水惟清盥以致潔感通神明

升殿用保安

三陽交泰日新惟良大建厥祀茲報興王禮嚴陟降德
薦馨香聿懷嘉慶降福穰穰

感生帝位奠玉幣用光安

肅肅嚴祀神幽必聞騁駕臨饗將歆飭芬嘉玉陳幣欽
恭無文永綏多祐國祚何垠

僖祖位奠幣用皇安

於穆文獻景炎發祥啓茲皇運垂慶無疆篚幣有陳式
昭肅莊神之格思如在洋洋

奉俎用咸安

籩豆大房秩秩在列奉牲以告既全既潔樂均無爽牲
醴攸設神兮燕娛霓旌孑孑

感生帝位酌獻用崇安

盛德在火相我炎祚典祀有常牲玉維具風馬雲車翩
翩來顧式蕃帝祉後昆有裕

僖祖位酌獻用肅安

皇矣文獻開國有先德配感生對越在天練日得辛來
止靈壇神其錫羨瑞應猗蘭

文舞退武舞進用正安

苾苾芬芬神具醉止笙磬鏗鏘干旄旒假無言神

靈惟喜申錫蕃釐暨我孫子

亞終獻用文安

偉矣厥初緣感而系慶行式崇昭融有契樂功既諧觴
獻斯繼歆類不違克昌百世

徹豆用肅安

潔陳斯備昭格惟禋神歆以飫宰徹其餽清歌振曉叶
氣流春永錫祚嗣以渥烝民

送神用大安


豐祀孔飾肅來自天蘭尊既徹飈馭載遙騎雲縹緲聆
樂流連惟邁惟顧降福綿綿

望燎用普安

禮文既洽熏燎聿升嘉氣四塞丹誠上騰惟類之應惟
福之興永熾天統億載靈承



御製律呂正義後編卷九十七



總校官庶吉士臣張能照

校對官檢討臣王坦修

謄錄監生臣張同弼

欽定四庫全書薈要

子部

御製律呂正義後編卷九十八

詳校官主事臣陳木



欽定四庫全書薈要卷一萬一千三十四

子部

御製律呂正義後編卷九十八

樂章考六

郊祀

宋二



宋大享明堂樂章

案宋史樂志曰仁宗景祐時大享明堂真宗配位奠幣用誠安酌獻用德安凡二章

真宗配位奠幣用誠安

思文聖考對越在天侑神作主奉幣申虔

酌獻用德安

偃革興文封巒考瑞威烈巍巍允膺宗祀

皇祐明堂樂章

案宋史樂志曰仁宗皇祐時親享明堂降神用誠
安奠玉幣用鎮安酌獻用慶安三聖配位奠幣用
信安酌獻用孝安送神用誠安凡六章

降神用誠安

維聖享帝維孝感親肇圖世室躬展精禋鏞鼓既設籩
豆既陳至誠攸感保格上神

奠玉幣用鎮安

乾亨坤慶育函生路寢明堂致潔誠玉帛非馨期感格

降康億載保登平

酌獻用慶安

肅肅路寢祀維明堂二儀鑒止三聖侑旁靈期訢合祠
節齊莊至誠並貺降福無疆

三聖配位奠幣用信安

祖功宗德啓隆熙嚴配交修太室祠主幣薦誠知顧享
本支錫羨固邦基

酌獻用孝安

藝祖造邦二宗紹德肅雍孝享登配圜極先訓有開菲躬何力歆馨錫羨保民麗億

送神用誠安

我將我享辟公顯助獻終豆徹禮成樂具飾駕上遊升
裡高驚神保聿歸介茲景祚

嘉祐明堂樂章

案宋史樂志曰仁宗嘉祐時親享明堂降神用誠
安送神用誠安凡二章

降神用誠安

曄曄房心下照重屋我嚴帝親匪配之瀆西顛沆碭夕
景已肅靈其來娛嘉薦芳郁

送神用誠安

明明合宮莫尊享帝禮樂熙成精與神契桂尊初闌羽
駕倏逝遺我嘉祥於顯萬世

熙寧明堂樂章

案宋史樂志曰神宗熙寧以後祀明堂英宗奠幣

用誠安酌獻用德安凡二章

英宗奠幣用誠安

於皇聖考克配上帝永言孝思昭薦嘉幣

酌獻用德安

英聲邁古德施在民允秩宗祀賓延上神

元符明堂樂章

案宋史樂志曰哲宗元符親郊明堂皇帝升降用
儀安上帝位奠玉幣用鎮安神宗奠幣用信安奉

俎用禧安上帝位酌獻用慶安配位酌獻用德安
退文舞迎武舞用穆安亞獻用穆安飲福用昨安
徹豆用欽安歸大次用憇安凡十有一章

皇帝升降用儀安

嚴父配天孝乎明堂與奠升階降音以將天步有節帝
容必莊辟公憲之禮無不臧

上帝位奠玉幣用鎮安

聖能享帝孝克事親於皇宗祀盛節此陳何以薦虔二

精有煒何以致祥上天鑒止

神宗奠幣用信安

合宮禮備時維哲王堂筵四敞明德馨香聖考來格降
福穰穰承承繼繼萬祀其昌

奉俎用禧安

奕奕明堂天子即事奠我聖考配于上帝凡百有職疇
敢不祗俎潔牲肥其登有儀

上帝位酌獻用慶安

惟禮不瀆所以嚴親惟孝不匱所以教民陟配文考享
于大神重禧累福祚裔無垠

配位酌獻用德安

隆功駿德兩有烈光陟配宗祀惠我無疆

退文舞迎武舞用穆安

舞以象功樂惟崇德文經萬邦武靖四國一弛其
儀不忒神鑒孔昭孝思維則

亞獻用穆安

於昭盛禮嚴父配天盡物盡誠莫匪吉蠲重觴既薦九
奏相宣神介景福億萬斯年

飲福用胙安

莫尊乎天莫親乎父既享既侑誠申禮舉戛擊堂上八
音始具天子億齡飫神之胙

徹豆用欽安

穆穆在堂肅肅在庭於顯辟公來相思成神既歆止有
聞無聲錫我休嘉燕及羣生

歸大次用懋安

有奕明堂萬方時會宗子聖考作帝之配樂酌虞典禮
從周志釐事既成於皇來暨

大觀明堂樂章

案宋史樂志曰徽宗大觀宗祀明堂奠玉幣用鎮
安配位奠幣用信安酌獻用孝安配位酌獻用大
明凡五章

奠玉幣用鎮安 二章

交于神明內心為貴外致其文亦效精意嘉玉既陳將
以量幣肅肅雖雖惟帝之對

有邦事神享帝為尊內心致德外示彌文嘉玉效珍薦
以量幣恭欽伊何惟以宗祀

配位奠幣用信安

肇祀明堂告成大報顯顯祗祗率見昭考涓選休成齊
明朝夕於惟皇王孝思罔極

酌獻用孝安

若昔大猷孝思維則永言孝思丕承其德於昭明威侑
于上帝賚我思成永綏福祉

配位酌獻用大明

於昭皇考大明體神憲章文思宜民宜人嚴父之道陟
配于天躬行孝告有孚于先

紹興明堂樂章

案宋史樂志曰高宗紹興親享明堂皇帝入門用
儀安升堂用儀安降神用誠安盥洗用儀安上帝

位奠玉帛用鎮安皇地祇位奠玉帛用嘉安太祖

位奠幣用廣安太宗位奠幣用化安徽宗位奠幣

用泰安皇帝還位用儀安尚書捧俎用禧安昊天

上帝位酌獻用慶安皇地祇位酌獻用彰安太祖

位酌獻用孝安太宗位酌獻用韶安徽宗位酌獻

用成安皇帝還小次用儀安文舞退武舞進用穆

安亞獻終獻各用穆安皇帝飲福用胙安徹豆用

歌安送神用誠安望燎用儀安望瘞用儀安還大

次用懋安凡二十六首

皇帝入門用儀安

惟我有宋昊天子之三年卜祀百世承基施及冲眇奉
牲以祠敢忘齋栗遍舉上儀

升堂用儀安

於赫明堂肇稱禋祀祖宗來游亦侑于帝九州駿奔百
辟咸事歛時純休錫我萬世

降神用誠安

噫神何親惟德是輔玉牲具陳誠則來顧我開明堂導
國之故尚蒙居歆以篤宗祜

盥洗用儀安

肇開九筵維古之倣皇皇大神來顧來享庶儀交修百
辟顯相微誠自中交際天壤

上帝位奠玉幣用鎮安

皇皇后帝周覽四方眷我前烈燕娛此堂金支秀發黼
帳高張世歆明祀曰宋是常

皇地祇位奠玉幣用嘉安

至哉坤元持載萬物繼天神聖觀世治忽頌祇之堂薦
以圭黻孰為邦休四海無拂

太祖位奠幣用廣安

推尊太元重屋為盛誰其配之我祖齊聖開基握符正
位凝命於萬斯年孝孫薦慶

太宗位奠幣用化安

帝神來格靡祀不從侑坐而食獨升祖宗在庭祇肅展

采錯重三獻之禮百年之容

徽宗位奠幣用泰安

於穆帝臨至矣元造克配其儀惟我文考仁恩廣覃奕葉永保宗祀惟初以揚孝道

皇帝還位用儀安

耳聽銅玉目瞻煥珠樂備周奏儀參漢圖神人並況天地同符亦既見帝王心則愉

尚書捧俎用禧安

展牲登俎簫韶在庭羞陳五室意徹三靈匪物斯享惟
誠則馨永作祭主神其億寧

昊天上帝位酌獻用慶安

日在東陸維時上辛肇開陽館恭禮尊神蒼玉輝夜紫
烟煬晨祖宗並配天地同禋

皇地祇位酌獻用彰安

地禋泰圻歌同我將黝牲純潔絲竹發揚博厚而久含
洪以光扶持宗社曰篤不忘

太祖位酌獻用孝安

一德開基百年垂統中天禘郊薄海朝貢寶龜相承器
鼎加重澤深慶綿帝復命宋

太宗位酌獻用韶安

紹天承業繼世立功帷幄屢勝車書始同武掃氛霧文
垂日虹遺澤所及孰知其終

徽宗位酌獻用成安

欽惟合宮承神至尊祇戒專精儼然若存莫茲嘉觴

蘭其芬發祉隕祥以子以孫

皇帝還小次用儀安

匏尊既舉鞮席未移有德斯顧靡神不嫉物情肅穆天
宇清夷宅中受命永復邦基

文舞退武舞進用穆安

神之歆至慶陰杳冥風馬雲車恍若有承備彤聲容於
昭文明庶幾嘉虞來享來寧

亞獻用穆安

四阿有嚴神既戾止備物雖儀潔誠惟已有來振振相
我熙事載酌陶匏以成茲祀

終獻用穆安

誠一為專禮三而稱孰陪邦祠惟我同姓金絲屢調圭
玉交映是謂熙成福來神聽

皇帝飲福用昨安

孰謂天遠至誠則通孰謂地厚與天則同惠我純嘏克
成大功握圖而治如日之中

徹豆用歌安

工祝告休笙鏞云闋酒茅既除牲俎斯徹幽明罔恫中
外咸悅禮成伊何天地同節

送神用誠安

奕奕宗祀煌煌禮文高靈下墮精意升聞熙事既畢忽
乘青雲敢拜明貺永清世氛

望燎用儀安

載酌載獻以純以精歌傳夜誦物備秋成報本斯極聽

卑則明願儲景貺福我羣生

望瘞用儀安

禮協豐融誠交彷彿辟公受膳宗祀臨瘞貽我來年以
興嗣歲山川出雲天地同氣

還大次用憇安

應天以實已事而竣羶案朝帝竹宮拜神靈光下燭協
氣斯陳福祿時萬基圖日新

紹興淳熙明堂樂章

案宋史樂志曰紹興淳熙分命館職定撰明堂樂

章降神用景安盥洗用正安升殿用正安上帝位
奠玉幣用嘉安太宗位奠幣用宗安捧俎用豐安
上帝位酌獻用嘉安太宗位酌獻用德安文舞退
武舞進用正安亞終獻用文安徹豆用肅安送神
用景安高宗位奠幣用宗安酌獻用德安凡十七
章又按孝宗親享明堂樂曲並同惟天地位奠幣
酌獻及太祖酌獻皇帝入小次還大次亞獻送神

等篇各有刪潤又以太祖奠幣曲改名廣安酌獻
改名恭安太宗奠幣改名化安酌獻改名英安餘
俱仍舊名

降神用景安

圓鍾為宮

上直房心時惟明堂配天享親宗祀有常盛德在吉日
吉辰良享我克誠來格來康

黃鍾為角

合宮盛德金商令時備成熙事蒐揚上儀駿奔在庭精
意肅祇來享嘉薦神靈燕娛

太族為徵

休德孔昭靈承上帝孝極尊親嚴配於位嘉薦芬芳禮
無不備神其格思享茲誠至

姑洗為羽

霜露既降孝思奉先陟降上帝禮隆九筵有馨黍稷有
肥牲牲神來燕娛想像肅然

盥洗用正安

禮經之重祭典為宗上公攝事進退彌恭庶品豐潔令儀肅雍百祥萃止惟吉之從

升殿用正安

皇祖配帝歲祀明堂冕服陟降玉佩瑒瑒疾徐有節進止克莊維時右享日靖四方

上帝位奠玉幣用嘉安

大享季秋百執揚厲明明太宗赫赫上帝祇薦忱誠式

嚴圭幣祚我明德錫茲來裔

太宗位奠幣用宗安

穆穆皇祖丕昭聖功聲律身度樂備禮隆祇薦量幣祀
于合宮玉帛萬國驩心載同

奉俎用豐安

備物昭陳工祝告具維羊維牛孔碩孔庶有嘉維馨加
食宜旣歛時五福永膺豐祚

上帝位酌獻用嘉安

曄彼房心明明有融維聖享帝禮行合宮祀事時止粢
盛潔豐昭受申命萬福攸同

太宗位酌獻用德安

受命溥將勲高百王寰宇大定聖治平康有嚴陟配宗
祀明堂神保是格申錫無疆

文舞退武舞進用正安

溫厚嚴凝於皇上帝文德武功列聖並配舞綴象成肅
雍進退秉翟跋總干蹈厲

亞終獻用文安

總章靈承維國之常禮樂宣鬯降升齊莊竭誠盡志薦
茲累觴於昭在上申錫無疆

徹豆用肅安

於皇上帝肅然來臨恭薦芳俎以達高明烹飪既事享
于克誠以介景福惟德之馨

送神用景安

帝在合宮鑒觀盛禮黍稷惟馨神心則喜禮備樂成亦

既歸止億萬斯年以貺多祉

高宗位奠幣用宗安

赫赫高廟于堯有光覆被萬祀冠冕百王有量斯幣蠲
潔是將在帝左右維時降康

酌獻用德安

炎運中興蒼生載寧九秩燕豫三紀豐凝精祀上帝陟
配威靈錫羨祚祉萬世承承

宋祀皇地祇樂章

案宋史樂志曰真宗景德祀皇地祇降神用靜安奠
玉幣酌獻並用嘉安送神用靜安凡三章

降神用靜安

至哉厚德陟配天長沈潛剛克廣大無疆資生萬物神
化含章同和八變神靈效祥

奠玉幣酌獻用嘉安

於昭祀典致享坤儀備物咸秩柔祗格思功宣敏樹日
益鴻禧持載品彙率土攸宜

送神用靜安

妙用無方倏來忽逝
蠲潔寅恭式終禋瘞

景祐夏至祀皇地祇樂章

紫宗史樂志曰仁宗景祐夏至祀皇地祇御製樂章太祖奠幣用恭安酌獻用英安凡二章

太祖奠幣用恭安

赫矣淳耀俶載帝基一戎以定萬國來儀寅恭潔祀博厚皇祇威靈攸在福祿如茨

酌獻用英安

丕命惟皇萬物咸覩卜年邁周崇功冠禹有燁炎精大
昌聖祚酌鬯祈年永錫繁祜

熙寧祀皇地祇樂章

案宋史樂志曰神宗熙寧祀皇地祇迎神用導安
升降用靖安奠幣用釐安太祖用肇安司徒奉俎
用承安酌獻用和安太祖用侑安飲福用禋安退
文舞迎武舞用威安亞終獻用儀安徹豆用豐安

送神用阜安凡十有二章

迎神用導安

昭靈積厚混混坤輿配天作極陰慘陽舒齊明薦享百
福其儲庶幾來止風馬雲車

升降用靖安

有來穆穆臨此方丘其行風動其止霆收躬事匪懈豐
盛潔羞百昌咸殖允矣神休

奠幣用釐安

純誠昭融芳美嘉薦肅將二精以享以奠休光四充靈
祇來燕其祥伊何永世錫羨

太祖用肇安

於皇烈祖維帝所興光輝宗祀如日之升告靈作配孝
享烝烝錫茲祉福百世其承

司徒奉俎用承安

我修祀事于何致誠罔敢怠佚視茲碩牲納烹薦俎侑
以和聲格哉休應世濟皇明

酌獻用和安

猗嗟富媪博厚含宏發榮敷秀動植茲豐爰酌茲酒盼
嚮交通衆祥萃止垂祐無窮

太祖用侑安

光大含宏坤元之力海宇咸寧烈祖之德作配方壇不
僭不忒子孫其承毋替厥則

飲福用禔安

載登壇昨載酌尊彛牲酒嘉旨福祿純熙其福維何萬

物咸宜其祿維何永承神禧

退文舞迎武舞用威安

雍雍肅肅建我采旄舞以玉戚不吳不敖其將其肆脾
據嘉肴何以侑樂鐘鼓管簫

亞終獻用儀安

折俎在邊載羹在豆何以酌之酒醴是侑何以錫之貽
爾眉壽何以格之永爾康阜

徹豆用豐安

曳我黼黻履舄接武鏘我珩璜降升圉圉其將肆兮既
曰不侮其終徹兮恭欽惟主

送神用阜安

神兮來下享此苾芬酌獻雍雍執事孔勤神之還矣忽
乘飛雲遺我祺祥物象忻忻

常祀皇地祇樂章

案宋史樂志曰常祀皇地祇迎神用寧安升降用
正安奉俎用豐安退文舞迎武舞用威安送神用

寧安凡五章

迎神用寧安 八變

坤元之德光大無疆一氣交感百物阜昌吉蠲致享精
明是將介茲景福鼎祚靈長

升降用正安

禮經之重祭典為崇上公攝事登降彌恭庶品豐潔令
儀肅雍百祥萃止惟吉之從

奉俎用豐安

禮崇禋祀神鑒孔明牲牲博膾以魚以烹馨香蠲潔品
物惟精錫以純嘏享茲至誠

退文舞迎武舞用威安

進旅退旅載揚干揚不愆于儀容服有章式綏式侑神
保是聽鼓之舞之神永安寧

送神用寧安

物備百嘉樂周八變克誠是享明德斯薦神鑒孔昭蕃
禧錫羨回馭飄然邈不可見

紹興祀皇地祇樂章

案宋史樂志曰高宗祀皇地祇迎神用寧安盥洗
用正安升殿用正安正位奠玉幣用嘉安太祖位
奠幣用定安捧俎用豐安正位酌獻用光安太祖
位酌獻用英安文舞退武舞進用正安亞終獻用
文安徹豆用娛安送神用寧安凡一十五章
迎神用寧安

函鐘為宮

至哉厚德物生是資直方維則翕闢攸宜於昭祀典致
享坤儀禮罔不答神之格思

太族為角

歲事方丘舊典時式至誠感神馨非黍稷盼嚮來臨鑒
茲明德永錫坤珍時萬時億

姑洗為徵

至哉坤元乃順承天厚德載物含洪八埏日北多暑祀
儀吉蠲式昭母事敢告恭虔

南呂為羽

歲事方丘情文孔時名山大澤侑祭無遺牲陳黝犢樂
備咸池柔祇皆出介我繁禧

盥洗用正安

於穆盛禮肅肅在宮歲事有初置于東榮滌濯是謹惟
寅惟清祇薦柔嘉享茲克誠

升殿用正安

景風應時聿嚴茲祀用事方丘鏘鏘濟濟登降有節三

獻成禮神其格思錫我繁祉

正位奠玉幣用嘉安

坤元博厚對越天明展事方澤直惟顧歆嘉玉量幣祇
薦純精錫我繁祉燕及函生

太祖位奠幣用定安

苾祀泰圻柔祇是承於赫藝祖道格三靈式嚴配侑厚
德惟寧爰昭薦幣享於克誠

捧俎用豐安

丕答靈貺歲事方立豆登在列鼎俎斯儔牲牲告具寅
畏彌周柔祇昭格飈至雲流

正位酌獻用光安

祇事坤元飭躬敢憚爰潔粢盛載嚴圭瓚清明內融嘉
旨外粢介我繁釐時億時萬

太祖位酌獻用英安

皇矣藝祖九圍是式至哉柔祇萬彙允殖保茲嘉邦介
我黍稷酌鬯告虔作配無極

文舞退武舞進用正安

於穆媪神媿德彼天我修蒞祀以莫不虔肆陳時夏干
羽相宣靈其來游降福綿綿

亞終獻用文安

禮有祈報國惟典常籩豆豐潔升降齊莊備物致志式
薦累觴昭格來享自天降康

徹豆用娛安

承天效法其道貴誠牲羞黃犢薦德之馨芳俎告畢禮

備樂盈既靜既安庶物霑生

送神用寧安

至厚至深其動也剛精誠默通或出其藏神之言歸化
斯有光相我炎圖萬世無疆

宋祀神州地祇樂章

案宋史樂志曰宋初祀神州地祇降神用靜安奠玉
幣酌獻用嘉安送神用靜安凡三章

降神用靜安

膺膺郊原茫茫寓縣畫野分疆禹功疏奠靈祇是臻豆
邊祇薦幽贊皇圖視之不見

奠玉幣酌獻用嘉安

彤蜚儲靈肅恭用幣錡洋導和洪休允契嘉氣雲蒸浹
于華裔式薦坤珍聿符明世

送神用靜安

獻奠云畢純嘏祁祁威靈藏用邈矣何之

景祐祀神州地祇樂章

案宋史樂志曰仁宗景祐孟冬祭神州地祇太宗
位奠幣用化安酌獻用韶安凡二章

太宗位奠幣用化安

削平偽邦嗣興鴻業禮樂交修仁德該洽柔祇薦享量
幣攸攝侑坐延靈神休允答

酌獻用韶安

有煒彌文克隆宏構貽此燕謀具膺多祐嶰律吹葦爨
尊奠酒佐乃沈潛永祈豐楙

元符祭神州地祇樂章

案宋史樂志曰哲宗元符祭神州地祇迎神用寧安送神用寧安凡二章

迎神用寧安

八變

撫撫浚邦皇天是宅必有幽贊聰明正直布列籩豆考擊金石中外謐寧繫神之力

送神用寧安

都邑浩穰民物富盛主以靈祇昭乃丕應玉帛牲牲鐘

鼓筦磬祇薦攸歌歸于至靜

紹興祀神州地祇樂章

案宋史樂志曰高宗紹興祀神州地祇迎神用寧
安盥洗用正安升殿用正安神州地祇位奠玉幣
用嘉安太宗位奠幣用嘉安奉俎用豐安神州地
祇位酌獻用嘉安太宗位酌獻用化安文舞退武
舞進用文安亞終獻用文安徹豆用成安送神用
寧安望瘞用正安凡十有六章

迎神用寧安

函鐘為宮

芒芒下土恢恢方儀富媪統攝潛運八維爰稱元祀告
備吉時揭茲虔恭優其格思

太簇為角

洪惟坤元道著品物上配紫旻後載其德良月肇歲祭
器布列必先皇祇以迓景福

姑洗為徵

塊軋無垠磅礴罔測山盈川冲自生自植其報維何率
禮靡忒億萬斯年功被無極

南呂為羽

翕闢以時協氣陶蒸播之金石鏘厥和聲冥冥眈眈孔
享純誠是聽是娛邦基永寧

盥洗用正安

晨煬致煙淳然四施飄飄風馬彷彿來斯祀事惟清沃
之盥之載涓載肅罔有愧辭

升殿用正安

崇崇其壇屹矣層級佩約步趨降登中節左瞻右睨祥
風藹集旂旆羽紛昭鑒翊翊

神州地祇位奠玉幣用嘉安

璇璣諧序籍斂薦嘉昭答柔祇迭奏雅歌幣琮以侑儀
腆氣和靈其溥臨容與燕娛

太宗位奠幣用嘉安

穆穆令聞溥博有容澤被萬宇靡不率從恭陳量幣明

薦其衷禮亦宜之享德攸同

奉俎用豐安

肅肅嘉承唯德其物工祀以告繫民之力神哉廣生孔
蕃且碩奠于嘉壇吐之則弗

神州地祇位酌獻用嘉安

恭承明祀嘉薦令芳亦有桂酒誠慤是將瑟瓚以酌效
惟厥觴庶乎燕享永懷不忘

太宗位酌獻用化安

宗德含洪方祇可儼闢土開疆八埏同軌是用作配有
永無紀裸獻以享茂格蕃祉

文舞退武舞進用文安

奕奕綴兆咸池孔彰丕闡文德靡忘發揚進退有節乃
容之常樂備爾奏曄曄榮光

亞終獻用文安

縮酌以裸既旨且多二獻有序情文愈加黃祇臨享錫
以休嘉廣茲靈稷覃及邇遐

徹豆用成安

展牲告全迺登于俎竣事而徹侑以樂語奉釐宣室祚
我神主斂敷庶民並受其祐

送神用寧安

雲馭洋洋既歆既顧悠然聿歸曷求厥路欽想頌堂跛
立以慕賚我彤蠻莫不懌豫

望瘞用正安

神罔怨恫燕其有喜歲事告成爰修瘞禮樂闋儀備休

氣四起尚謹不愆念終如始

宋朝日樂章

案宋史樂志曰真宗景德朝日降神用高安奠玉幣酌獻用嘉安送神用高安凡三章

降神用高安六變

陽德之母義御寅賓得天久照首茲三辰正辭備物肅肅振振淪精降監克享明禋

奠玉幣酌獻用嘉安

醴齊良潔有牲斯純大采元冕乃昭其文王宮定位粢
盛苾芬民事以叙盛德升聞

送神用高安

縣象著明照臨下土降福穰穰德施周普

紹興朝日樂章

案宋史樂志曰高宗紹興朝日降神用高安初獻
升殿用正安奠玉幣用嘉安奉俎用豐安酌獻用
嘉安亞終獻用文安送神用禮安凡十章

降神用高安

圜鐘為宮

玄鳥既至序屬春分朝于太陽厥典備存載嚴太采示
民有尊揚光下燭煜爚東門

黃鍾為角

升暉麗天陽德之母率無頗偏兼燭下土恭事崇壇禮
樂具舉頡御六龍徘徊容與

太簇為徵

周祀及閭漢制中營彤蠻是屆禮神以兄我潔斯璧我
肥斯牲神兮燕享鑒觀孔明

姑洗為羽

屹爾王宮泛臨翊翊惠此萬方豈惟五色以修陽政以
習地德雲景杳冥施祥無極

初獻升殿用正安

天宇四霽嘉壇聿崇肅祇嚴祀登降有容仰瞻曜靈位
居其中既安既晏沛哉豐融

奠玉幣用嘉安

物之備矣以交於神時維炎精不忘顧歆經緯之文璆
琳之質燦然相輝其儀秩秩

奉俎用豐安

扶桑朝暾和氣眇飭奉此牲牢為俎孔碩芬馨進聞介
我黍稷所將以誠茲用享德

酌獻用嘉安

匏爵斯陳百末旨酒勺以獻之再拜稽首鐘鼓在列靈

方安畱眷然加薦惟時之休

亞終獻用文安

禮罄沃盥誠意肅將包茅是縮冀畢重觴煥矣情文既具醉止熙事備成靈其有喜

送神用禮安

羲和駕兮其容杲杲將安之兮言歸黃道光赫萬物無古無今人君之表咸仰照臨

宋夕月樂章

案宋史樂志曰景德夕月降神用高安奠玉幣酌獻
用嘉安送神用高安凡三章

降神用高安

六變

凝陰稟粹照臨八埏麗天垂象繼日代明一氣資始四
時運行靈祇昭格備物薦誠

奠玉幣酌獻用嘉安

夕耀乘秋功存寓縣金奏在縣以時致薦祀事孔寅明
靈降眷潔粢豐盛倉箱流衍

送神用高安

夙陳籩豆潔誠致祈垂休保佑景祚巍巍

大觀夕月樂章

案宋史樂志曰徽宗大觀秋分夕月降神用高安
奠玉幣酌獻送神並用高安凡四章

降神用高安

至陰之精虧而復盈輪高仙桂階應祥冀玉兔影孤金
莖露溢其駕星車顧于兹夕

奠玉幣用高安

玉鉤初彎冰盤乍圓扇掩秋後烏飛枝邊精凝蟾蜍輝
光嬋娟歆于明祀弭芳節焉

酌獻用高安

名稽漢儀歌參唐宗往于卿少乘秋氣中周天而行如
姊之崇可飛霞佩下瑠璃宮

送神用高安

四扉大開五雲車立霓裳姊從風翻童執搖曳胥來鏘

洋爰集歌我嚴裡西面以揖

紹興夕月樂章

案宋史樂志曰紹興夕月降神用高安升殿用正
安奠玉幣用嘉安奉俎用豐安酌獻用嘉安亞終
獻用文安送神用理安凡十章

降神用高安

圓鍾為宮

金行告道玉律分秋禮歲西郊祀聿修精意潛達永

孚于休神之聽之爰格飀游

黃鍾為角

時維秋仲夜寂天清實嚴姊事用答陰靈壇壝斯設黍稷惟馨雲車來下庶歆厥誠

太簇為徵

遡日著明麗天作配潔誠以祠禮行肅拜光凝冕服氣肅環珮庶幾昭格祇而不懈

姑洗為羽

穆穆流輝太陰之精盈虧匪忒寒暑以均克禋克祀揆
日涓辰牲碩酒旨來燕來寧

升殿用正安

猗歟崇基右平左城祇率典常屆茲秋夕陟降惟寅威
儀抑抑神其鑒觀穰簡是集

奠玉幣用嘉安

少采陳儀實曰坎祭禮備樂舉巖恭將事于以奠之嘉
玉量幣神兮昭受陰騭萬彙

奉俎用豐安

穀旦其差有牲在滌工祝致告為俎孔碩盼饗是期祚
我明德備茲孝欽式和民則

酌獻用嘉安

白臧在序享惟其時躬即明壇禮惟載祗斟以瑤爵神
靈燕娛歆馨顧德錫我蕃釐

亞終獻用文安

肅雍嚴祀聖治昭彰清酒既載或肆或將禮匝三獻終

然允臧神具醉止其樂且康

送神用理安

歌奏云闕式禮莫愆以我齊明罄其吉蠲神保聿歸降
康自天蘿圖永固億萬斯年

宋祀高禱樂章

案宋史樂志曰神宗熙寧以後祀高禱降神用高安
升降用正安奠玉幣用嘉安酌獻用祐安亞終獻用
文安送神用理安凡六章按玄鳥至之日以太牢祀

高禘古有其制後自漢迄宋未見樂章至熙寧紹興始創此辭今附錄於郊祀後志典禮也

降神用高安六變

容臺講禮禘宮立祠司分屆後帶鞞陳儀嘉祥萃止靈馭來思皇支蕃衍永固邦基

升降用正安

郊禘之應肇自生商誕膺寶命濬發其祥天材蕃衍德稱君王本支萬世與天無疆

奠玉幣用嘉安

昔帝高辛先稷肇祀爰揆仲陽式祈嘉祉陳之犧牲授以弓矢敷佑皇宗施于孫子

酌獻用祐安

昭薦精衷靈承瑞命青帝顧懷神祿儲慶祚以蕃昌協于熙盛螽斯衆多流于雅詠

亞終獻用文安

赫赫高禋萬世所祀其德不回錫茲福祉蕃衍椒聊和

平糶官傳類降康世濟其美

送神用理安

禮奠蠲衷祭儀竣事丕擁靈休蕃衍皇嗣

紹興祀高禱樂章

案宋史樂志曰高宗紹興祀高禱降神用高安升
壇用正安奠玉幣用嘉安奉俎用豐安青帝位酌
獻用祐安亞終獻用文安送神用理安凡十章

降神用高安

圜鐘為宮

聿分春氣施生在時禘宮肇啟精意以祠禮儀告備神
其格思厥靈有赫錫我繁釐

黃鍾為角

眷此尊祀實惟仲春青圭束帛克祀克禋庶蒙嘉惠嗣
續詵詵神之降鑒雲車來臻

太簇為徵

猗歟禘宮祀典所貴粵自艱難禮或弗備以迄于今始

建壇壝願戒雲車歆此誠意

姑洗為羽

春氣肇分萬類滋榮惟此祀事皆象發生求神以類式
昭至誠庶幾來格子孫繩繩

升壇用正安

有奕禩宮在國之南壇壝既設威儀孔嚴登祀濟濟神
兮顧瞻佑我皇祚宜百斯男

奠玉幣用嘉安

青律載陽有鳳頡頏祈我繁祉立子生商三牲既薦玉帛是將克禋克祀有嘉其祥

奉俎用豐安

祇祓禩壇潔蠲羊豕博碩肥腍爰具牲醴執事駿奔肅將俎几神其顧歆永錫多子

青帝位的酌獻用祐安

伏羲高辛酌獻並同

瑞鳳至此祀事孔時酌以清酒裸獻載祇神具醉止介我蕃禧乃占吉夢維熊維羆

亞終獻用文安

中春涓吉歲事禱祠禮備樂作邊豆孔時貳觴畢舉薦
獻無違庶幾神惠祥啓熊羆

送神用理安

嘉薦令芳有嚴禋祀神來燕娛亦既醉止風馭言還粟
然歟起以祓以除錫我蕃祉

宋祀九宮貴神樂章

案宋史樂志曰真宗景德祀九宮貴神降神用高安

奠玉幣酌獻用嘉安送神用高安凡三章案九宮貴神之祭唐已有之宋亦仍其舊其始於景德者殆真宗受天書好道之故歟

降神用高安

倬彼垂象照臨下土躔次運行功德周普九宮既位惟德是輔神之至止皇皇斯覩

奠玉幣酌獻用嘉安

靈裡既肅明神既秩在國之東協日之吉升歌有儀六

變中律懷和萬靈降茲陰隲

送神用高安

祇薦有常惟神無方回飈整馭垂休降祥

元祐祀九宮貴神樂章

案宋史樂志曰元祐祀九宮貴神降神用景安送神用景安凡二章

降神用景安

六變

上天貴神九宮設位功德及物乃秩明祀望拜紫壇赫

然靈氣奠玉薦幣歆之無愧

送神用景安

天之貴神推移九宮厥位靡常降康則同來集于壇顧
歆恪恭歌以送之颺靜旋穹

紹興祀九宮貴神樂章

案宋史樂志曰高宗紹興祀九宮貴神降神用景
安初獻升壇用正安太一位奠玉幣用嘉安攝提
權星招搖天符青龍咸池太陰天一位樂曲並同

奉俎用豐安太一位酌獻用嘉安攝提等八位並
同亞終獻用文安送神用景安凡十章

降神用景安

園鍾為宮

紫闕幽宏惟神靈尊輔成泰元贊役乃坤曰雨曰暘經
豫調紛享薦隕光蒙祉如屯

黃鍾為角

載陽衍德農祥孔昭賚茲元嘏穰穰黍苗象輿眇冥金

奏遠妣無闕厥靈丹衷匪恍

太簇為徵

於赫九宮天神之貴煌煌彪列下土是蒞幽贊高穹陰
騶萬類肅若舊典有嚴祇事

姑洗為羽

練時吉良聿崇明祀染盛潔豐牲碩酒旨肅唱和聲來
燕來止嘉承天休賚及含齒

初獻升壇用正安

於昭祀周旋有容歷階將事趨進鞠躬改步如初沒
階彌恭左城右平陟降雍雍

太一位奠玉幣用嘉安

攝提等位樂曲並同

煌煌九宮照臨下土陰騭庶類功施周普恪修祀典禮
備樂舉嘉玉量幣馨非稷黍

奉俎用豐安

靈鑒匪遠誠心肅祇是烝是享俎實孔時禮行樂奏盼
嚮是期雲車風馬神其燕娛

太一位酌獻用嘉安

攝提等位樂曲並同

惟天丕冒彪列九神財成元化陰騭下民有酒斯旨登
薦苾芬昭哉降鑒第祿來臻

亞終獻用文安


均調大化陰騭下民駿功有赫誕舉明禋嘉觴中貳執
事惟寅清明鬯矣福祿攸臻

送神用景安

薦獻有序降登無違禮樂備舉昭格燕娛雲車縹緲神

曰還歸報以景貺翊我昌期

御製律呂正義後編卷九十八



總校官庶吉士臣張能照
校對官檢討臣王坦修
謄錄監生臣張同弼